

## Служба и акафистъ святителю Ермогену, патриарху всея Руси.

(Опытъ пѣснотворчества).

На малѣй вечерни, на Господи возвахъ, стихиры на 4,  
гласъ первый.

Подобень: Прехвальнии мученицы:

Прехвальный Ермогене мучениче, ты ни темница потаила  
есть, но Духа Божія благодать пріять ты, и исполнился еси духа  
разума, и внутрь себе бывъ Божіе царство созерцалъ еси.  
Христу молися, даровати душамъ нашимъ миръ и велію  
милость.

Прехвальный Ермогене мучениче, ты ни темница потаила  
есть: возсѣлъ бо еси тамо, яко на престолѣ, и отверзошася  
уста твоя и, въ темницѣ бывъ, всю Русь къ ратоборству за  
вѣру и отечество призвалъ еси. Христу молися, даровати  
душамъ нашимъ миръ и велію милость.

Прехвальный Ермогене мучениче, ты ни темница изнурила  
есть, но велія ревность Божія объять ты, и исполнился еси огня  
поясти хотящаго сопротивныя, и яко свѣтильникъ предъ  
Богомъ сгоралъ еси. Христу молися, даровати душамъ нашимъ  
миръ и велію милость.

Прехвальный Ермогене мучениче, ты ни земля потаила  
есть, но небо пріять ты, и отверзошася ти райскія двери, и  
внутрь бывъ древа животнаго наслаждаешься. Христу  
молися, даровати душамъ нашимъ миръ и велію милость.

Слава и нынѣ, Богородичень, подобень тойже.

Днесь священномученикъ Ермогенъ предстоить Божіей  
Матери и невидимо за ны молится съ нами: Заступнице

усердная, заступи, спаси и помилуй Русь православную и сохрани ю покровомъ Твояе благодсти.

На стиховнѣ стихиры, гласъ второй.

Подобенъ: Доме Евфраеовъ.

Граде Москва, сердце Руси православныя, граде великихъ святителей, украсися новымъ чудотворцемъ Ермогеномъ.

Стихъ: Честна предъ Господемъ смерть преподобныхъ Его.

Доме темчичный, доме святой, въ немъ же святитель скончася, веселися, обрѣлъ бо еси благодать: престоль Божія храма.

Стихъ: Въ память вѣчную будетъ праведникъ.

Доме священный, гробе святой, православныхъ славо, отверзися и буди источникъ жизни приснотекущія.

Слава, и нынѣ, подобенъ тойже:

Заступнице усердная, Мати Божія и предстательнице чистая, со святителемъ моли Сына Твоего о Твоихъ рабѣхъ.

Тропарь, гласъ четвертый\*:

Приспѣ день свѣтлаго торжества, градъ Москва радуется и съ нимъ Русь православная ликоствуетъ пѣснями и пѣнями духовными: днесъ бо священное торжество въ явленіи честныхъ и многоцѣлебныхъ мощей святителя и чудотворца Ермогена, якоже солнце незаходимое возсія свѣтозарными лучами, разгоняя тму искушеній же и бѣдъ отъ вопіющихъ вѣрно: спасай насъ, яко предстатель нашъ, великій Ермогене.

Слава, и нынѣ, Богородиченъ:

Еже отъ вѣка утаенное.

На величій вечерни, Блаженъ мужъ, 1-й антифонъ. На Господи возвахъ, стихиры на 8, гласъ 3-й.

Гласъ святыя церкви православныя, гласъ со умиленіемъ любви взывающій: приидите, чада моя, ими же болѣзную. Приидите къ святителю великому, приидите къ священномученику предивному, приидите къ молитвеннику за Русь православную неотступному, припадите и молитесь изъ глубины души: священномучениче Ермогене, спасай и нынѣ юже

\* Поется 12 го маіа.

возлюбилъ еси святую Русь православную, озлобленіемъ грѣха во глубину золь погружаему, но въ покаяніи зовущу: Господи, Господи, услыши гласъ мой.

Кто сей колѣна тѣлесе и души со умиленіемъ преклоншій? кто сей на лице свое падшій? кто сей надежду очи на небо возводяшій и со упованіемъ неложнымъ руки своя въздѣющій? кто сей плачущій и рыдающій? Ты еси священномучениче Ермогене, ты еси печальниче земли нашея, преложивый плачь ея на радость, молящуся ти и зывающу: вонми гласу моленія моего, Господи.

Господи, аще не быхомъ святаго Твоего священномученика Ермогена имѣли молитвенника и благодѣянію Твою милующую насъ, како смѣли, Спасе, стояти предъ лицемъ Твоимъ во грѣсѣхъ нашихъ даже до сего дне? Како смѣли быхомъ противустати врагомъ нашимъ и оградити вѣру отецъ нашихъ и утвердити царство православное? Но услышалъ еси молитву святителя великаго, Ермогена священномученика предивнаго, и собралъ еси подъ крилъ его Русь православную, и погналъ еси враги ея предъ лицемъ ея, Его же молитвами и нынѣ пощади насъ и спаси насъ, Господи.

Живо слово Господне и дѣйственно: не убойтеся отъ убивающихъ тѣло, души же не могущихъ убити: убойтеся же паче могущаго и душу и тѣло погубити въ гееннѣ. Потерпѣ душа твоя въ слово сіе, священномучениче Ермогене: Единаго боюся живущаго на небесѣхъ, реклъ еси беззаконнымъ измѣнникомъ. Что ми есть заточеніе?—Сладость молитвы уединенныя. Что ми есть мразъ и гладь?—Умираніе жизни грѣховныя. Что ми есть смерть?—Радость свиданія со Христомъ. Не боюся страха смертнаго: вся потерплю за Возлюбившаго мене, потерплю и не отвергуся, яко спасеніе Руси отъ Церкви православныя и отъ Помазанника ея Державнаго. Сіе разумѣйте и сему покаряйтеся, яко съ нами Богъ Своею благодатію.

Разумѣйте языцы и покоряйтеся, услышите до послѣднихъ земли: аще бо паки возможете, и паки побѣждени будете, не дремлютъ бо очи святителя Ермогена на стражѣ Руси православныя, не умолкаютъ уста во всеоружіи истины, сердце же бдитъ отъ стражи утреннія до ноши, уповающу ему на Господа и молящуся: да вознесетъ на Руси Церковь православную и да укрѣпитъ на вѣки царство Помазанника

ея, вся могущаго о укрѣпляющемъ Іисусѣ и царствующаго во откровеніе истины языкомъ о имени Господнемъ.

Постигоша Русь грѣси ея, потоцы беззаконія смятоша ю: приложи бо беззаконіе къ беззаконію и погибаше за беззаконіе свое, но обратися ко Господу и спасеся, святителю Ермогену проповѣдующу и къ покаянію призывающу: приндите, чада, послушайте мене, премудрости спасенія научу вы: отъ лица грѣхъ вашихъ отвратитесь и ко Господу Богу обратитесь, исповѣдайте на ся грѣхи ваша и въ беззаконіихъ вашихъ смиритесь: любить бо Господь смиренныя сердцемъ и сокрушенныя духомъ приемиетъ, яко у Господа милость и многое у Него избавленіе.

Сиче рекль еси, святителю Ермогене, врагомъ царства православнаго: тако вѣрую и тако исповѣдую: подобаетъ царю Руси быти православному, и о Церкви святѣй рачительну, и о чадѣхъ Церкви попечительну, и о народѣхъ царства промыслительну: да восхваляютъ Господа вси людие и вси языцы да похвалятъ Его, да будутъ вси едино стадо подъ скипетромъ державы его, и да поють вси единѣми усты и единѣми сердцемъ велико имя святыя Троицы.

Молитвами святителя Ермогена пріялъ есть Господь покаяніе рыдающихъ предъ Нимъ и утвердилъ есть милость Свою на боящихся Его; и се, на Руси православнѣй радуются о Господѣ и веселятся о Дусѣ Святѣ, царіе силою Христовою хвалятся и славою святыя Церкви величаются, людие горняя мудрствуютъ, ищуще небеснаго Іерусалима, истина православія народомъ царства благовѣствуется во спасеніе всея земли. Тако истина Господня пребываетъ въ родѣ нашемъ и милость Его на насъ утверждается.

Слава, и нынѣ, Богородиченъ: Како не дивимся.

Входъ. Прокименъ. Чтенія три.

Притчей чтеніе: Память праведнаго.

Притчей чтеніе: Уста праведнаго.

Премудрости Соломона чтеніе: И праведникъ аще постигнетъ.

На литіи стихиара храма; таже стихиры Ермогена, гласъ первый: самогласны.

Что сіе есть празднество? что есть шумъ освященнаго собора? что сіе есть благохвальное и красное собраніе? Священницы радуются, людие въ веселіе облакаются, и вся

православная Русь торжествуетъ, святителю Ермогену предлежащу и всѣхъ отъ раки мощей своихъ благословляющую и всѣхъ благодатно утѣшающую и тайно глаголющую: не бойся, малое стадо, не потопити морю житейскому корабля Исусова, не погибнетъ Русь православная и Богомъ любимая, яко благоизволилъ Господь дати намъ царство, на камнѣ бо вѣры и правды стоимъ.

Приидите вси вѣрніи, святителя Ермогена восхвалимъ, звѣзду отъ востокъ солнца возсіявшую и западъ солнца православіемъ вѣры озарявшую и нынѣ звѣзду нову на небесѣхъ славы въ сонмѣ священномученикѣ, явленную въ помощь Церкви и царю противу враговъ нашихъ и во утверженіе вѣры отцевъ нашихъ: Господи, молитвами его миръ Твой подаждь намъ и велію милость.

Что ты наречемъ, святителю Ермогене? ангела ли? апостола ли или мученика? Ангела, зане яко хранитель православныя Руси спутьствующъ и спасительная предлагающъ былъ еси. Апостола, яко невѣрныя научилъ еси. Мученика же, яко за православіе царства душу свою Христа ради положилъ еси: Его же моли помиловати души наша.

Слава и нынѣ, богородиченъ, гласъ тойже:

Притецемъ нынѣ къ Матери Господа Вышняго и вкупѣ со святителемъ Ермогеномъ воспоемъ Заступницу усердную: за всѣхъ молитъ бо Сына Своего, Христа Бога нашего, и всѣмъ творить спастися, въ державный Ея покровъ прибѣгающимъ.

На стиховнѣ стихиры, гласъ шестый. Подобенъ:

Тридневенъ воскреслъ еси:

Святителю Ермогене, молимъ тя: призри на Русь и посѣти ю молитвою: Господи, да исчезнуть врази православныя яко дымъ, и яко воскъ отъ лица огня да догибнуть.

Стихъ: Честна предъ Господемъ смерть преподобныхъ Его.

Молитву мою пролю ко Господу и Тому возвѣщу печали моя: се, азъ душу мою полагаю за овцы моя. Господи, прими ю, яко кадило молитвы о Руси православнѣй: сотвори ю святу и правовѣрну во вѣки.

Стихъ: Священницы Твои облечутся въ правду и преподобніи Твои возрадуются.

Облецы насъ молитвами твоими, святителю отче нашъ, и

науци насъ православно молитися: Господи, Господи, спаси насъ, прежде даже до конца не погибнемъ.

С л а в а, и н ы н ѣ, Богородичень, подобень той же:

Святителю Ермогену предстоящу Божіей Матери и молящуся о Руси, вси прилѣжно помолимся: Пресвятая Богородице, помогай намъ.

На благословеніи кѣѣбовъ тропарь дважды: писанъ на мачѣй вечерни. И Богородице Дѣво: единожды. А идѣже нѣсть всенощнаго бдѣнія, на величѣй вечерни по Нынѣ отпушаеши глаголемъ тропарь единожды.

С л а в а, и н ы н ѣ, Богородичень воскресень.

На утрени, на Богъ Господь:

Приспѣ день свѣтлаго торжества: Дважды.

С л а в а, и н ы н ѣ, Богородичень: Еже отъ вѣка утаенное.

По первомъ стихословіи сѣдальны, гласъ четвертый, подобень: Явился еси.

Строителя земли нашея во дни нестроенія, вѣрніи, сошедшея восхвалимъ: яко царство согласно закону и благодати намъ проповѣда, и самозванныя богопротивныя власти явѣ обличивъ дерзновеннѣ, въ темницѣ гладомъ замучень бысть: и нынѣ со священномученики живущи Христу молитя, спастися намъ.

#### С л а в а:

Свѣтлую твою память днесъ творяще, Спаса и Господа молити прилежно тя молимъ, священномучениче Ермогене, закономъ дати православное утвержденіе.

И н ы н ѣ, Богородичень:

Теплое заступленіе сущимъ въ бѣдахъ и помощницу нашу, Еюже рабства иноземнаго и латинства сквернаго избавихомся, Богородицу вѣрніи ублажаемъ.

По второмъ стихословіи сѣдальны, тойже гласъ и подобень:

Явился еси днесъ Руси православиѣ, и свѣтъ твоего благоволенія знаменася на насъ, въ разумѣ поющихъ тя: пришелъ еси и явился еси, чудотворецъ преславный.

#### С л а в а:

Притецемъ, вѣрніи, къ рацѣ мощей святителя Ермогена, и пролиемъ предъ нимъ печаль нашу, и скорбь нашу предъ

нимъ возвѣстимъ, да обрящемъ велие утѣшеніе: всякъ бо вѣрующій не отъидеть тощъ.

### И н ы н ѣ:

Днесъ Владычица міра радуется, зря святителя Ермогена отъ Христа вѣнчанпаго силою многою и присно о Руси молящагося. Егоже молитвами, Мати Бога Вышняго, покрый насъ покровомъ Твоея благодати.

По полчелееи сѣдальны, гласъ и подобенъ. тойже:

Премудраго іерарха восхвалимъ, яко кормчаго православныя Руси, къ горнему Іерусалиму путеводствующа, и на всяку правду наставляюща, и отъ всякаго зла спасающа—Слава.

Премудраго іерарха восхвалимъ, яко ангела хранителя Руси, спутьствующа и спасительная предлагающа и царство наше въ православномъ самодержавіи утверждающа, и Христа въ немъ воображающа.

### И н ы н ѣ:

Ублажимъ Честнѣйшую горнихъ воинствъ: Та бо помогла естъ святителю Ермогену упокоитися въ вѣчныхъ обителѣхъ, Та бо спасетъ и насъ грѣшныхъ.

По 50 псалмѣ стихира, гласъ 4, подобенъ: Явился еси.

Предстатель теплѣйшій царства православнаго показался еси, Ермогене, и инославная безбожная ученія отвергая со дерзновеніемъ, правило показался еси всѣмъ православія, о всѣхъ моляся послѣдующихъ твоимъ божественнымъ ученіемъ и наказаніемъ.

Канонъ Богородицы со ирмосомъ на 6, гласъ 8:

Воду прошедъ: и святителя, егоже краегранесіе:

Вонми, земле, гласу святителя Ермогена: святая и Богомъ любимая Русь не погибнетъ. Тропари на 8, гласъ тойже.

### Пѣ с н ь 1. Ир м о с ь:

Пѣснь возслемъ, людіе, чудному Богу нашему, свободившему Израиля отъ работы, пѣснь побѣдную поюще и вопіюще: поимъ Тебѣ единому Владыцѣ.

Вѣдущи воскликновеніе, пойте и величайте святителя великаго и взирая на кончину его подражайте вѣрѣ его.

Обиліе благодати окрестъ твоея раки, святителю Ермогене,

ея же ради прославляемъ тя, яко новоявленнаго чудотворца и просимъ исцѣленій.

Начало премудрости страхъ Господень, научивый и тя, святителю, работати Господеви съ трепетомъ и радоватися предъ лицемъ Его. Дажь и намъ, по молитвѣ твоей, положи сие начало благое.

Многи скорби праведнымъ и отъ всѣхъ ихъ избавить я Господь. По словеси сему бысть житіе твое, святителю. И се, нынѣ радуешися на небесѣхъ и радуеши всѣхъ чтущихъ память твою.

Испытающій свидѣнія Божія былъ еси, святителю: въ законѣ бо Христовѣ поучался еси день и ночь, и оправданія Господня права суть: въ селенія бо праведныхъ всели тя Господь.

Заповѣди Господни отъ юности возлюбилъ еси и преданія святыхъ отецъ даже до смерти соблюлъ еси, святителю, и нынѣ съ ними сопрославляеши Бога. Егоже моли, да спасеть тобою души наша.

Егоже возлюбилъ еси и Емуже ревностно поработалъ еси, нынѣ съ лики святыхъ воспѣваеши и молишися за ны.

### Б о г о р о д и ч е н ь :

Молитвеннице неложная, Заступнице рода христіанскаго, прими мольбы отъ насъ, прилежно призывающихъ и молящихся Тебѣ: покрый страну нашу православную покровомъ Твоея благодати.

### П ѣ с н ь з. И р м о с ь :

Ты еси утверженіе притекающихъ къ Тебѣ, Господи: Ты еси свѣтъ омраченныхъ, и поеть Тя духъ мой.

Лѣта древняя помянухъ и поучихся во всѣхъ дѣлѣхъ твоихъ, святителю, и обрѣтохъ вѣдѣніе, како жити въ мірѣ семъ отъ святыхъ отецъ и отъ житій святыхъ вразумляеся.

Епископъ мудрый людемъ и царству былъ еси, святителю, уподобился еси мужу, смотрящу лице бытія царства православнаго въ лѣтописѣхъ древнихъ, яко же въ зеркалѣ, получающуся премудрости православія во днѣхъ древнихъ.

Господи Господь нашъ, яко чудно имя Твое по всей Руси. Господь посмѣется врагомъ нашимъ. Господь заступникъ нашъ. Сію правду живописалъ еси, святителю, картіею и



черниломъ, поучая роды родовъ, яко лѣтописецъ православныя Руси.

Людіе поучитесь, людіе умилитесь, вразумляюще себе самѣхъ въ пѣніихъ и пѣснехъ духовныхъ, ими же прославиль есть святитель Ермогенъ Заступницу рода нашего.

Аще не Господь созиждетъ домъ, всуе трудишася зиждущи. Сію истину внушалъ еси, святителю, стражемъ земли нашея, да не осуется помышленіи своими и да не всуе мятутся.

Священникъ церкви святителя Николая былъ еси, Ермогене, и възгрѣвая даръ, живущій въ тебѣ, велію любовь Богоматере стяжалъ еси, Еюже отъ славы въ славу даже до небесе влекомъ былъ еси и въ селеніихъ праведныхъ вселился еси.

Уподобился еси купцу, многоцѣненъ бисеръ обрѣтшу, егда икону Богоматере отъ земли подъялъ еси, яко сокровище благодати, нищія духомъ обогащающее.

#### Б о г о р о д и ч е н ь :

Сказаніе чудесъ Твоихъ, Богородице, еже написа святитель Ермогенъ во славу иконы Твоея Казанскія, воздвизаетъ всю Русь православному присно прибѣгати къ Тебѣ во всѣхъ обстояніихъ и прилѣжно молити: Пресвятая Богородице, помогай намъ.

Сѣдаленъ, гласъ 8. Подобенъ: Премудрости:

Возшедь на высоту небесную, и божественными оттуду, отче, озарився сіяніи чудесъ, пресвѣтель воистину явился еси православнѣйи Руси пастырь, намъ въ напастѣхъ сынъ предстатель непобѣдимъ; тѣмъ же преславно враги побѣдивъ, лжу инославія отгнавъ еси, и царство православное спаслъ еси отъ погибели, Ермогене. Моли Христа Бога, грѣховъ оставленіе даровати и православному Русь въ любви Божіей даже до вѣка соблюдать чтущимъ любовію святою память твою.

С л а в а , и н ы н ѣ , Б о г о р о д и ч е н ь :

Святителю Ермогену подражающе, почтимъ пресвѣтлую икону Богоматере, яко источникъ неисчерпаемый исцѣленій, и ублажимъ Матеръ Бога Вышняго, яко Дѣву и едину въ женахъ, безъ сѣмене родшую Бога плотю.

## Пѣснь 4. Ирмосъ:

Услышахъ, Господи, смотренія Твоего таинство, разумѣхъ дѣла Твоя, и прославихъ Твое божество.

Возвѣстите во языцѣхъ дѣла Божія, яже явилъ намъ есть Господь Вседержитель отъ иконы Своея Матере, рекль еси святителю: да не рекутъ языцы: гдѣ есть Богъ ихъ, въ Него же вѣрують, и да заградятся уста ихъ.

Ята бысть землю, но не удержанна, икона Пречистыя, да будетъ во утверженіе новопросвѣщеннымъ, блуждающимъ же во тьмѣ невѣдѣнія во откровеніе свѣта истины, яко же мудрствуетъ о семъ святитель Ермогенъ.

Ты еси изрядное пѣніе чудесъ Пренепорочныя, ты еси утверженіе кромлющихъ, ты еси свѣтъ православный омраченныхъ, и поеть тя духъ мой.

Иго благое и бремя легкое подъяль еси, Ермогене, егда образъ ангельскій воспріяль еси, да придеши въ возрастъ мужа совершенна.

Тебѣ, одѣющагося молитвою, яко ризою, добродѣтелей подвижника, Спасова обитель видя зѣло радовася: грядеть бо священно-архимандритъ обновити обитель и утвердити благочестіе.

Ермолаю тезоименитый усовершился еси, Ермогену же жительствуя угодился еси: и се, яко свѣтильникъ немерцающій, поставляешися на свѣщницѣ казанскія митрополіи.

Лѣпо есть возлюбившему Сладчайшаго улаждати, премудрому безуміемъ Христа ради умудрати, сильному о Господѣ укрѣпляти: лѣпо есть святительствовати Ермогену, вся могущему о Христѣ Иисусѣ.

## Богородиченъ:

Яко госпожу, царицу и владычицу, заступающую всѣхъ насъ, въ державный Твой покровъ прибѣгающихъ, поеть Тя святой Ермогенъ, съ нимъ же пріими и наша моленія и спаси души наша.

## Пѣснь 5. Ирмосъ:

Утренююще вопіемъ Ти: Господи, спаси ны, Ты бо еси Богъ нашъ, развѣ Тебе иного не знаемъ.

Егда былъ еси въ Казани, невѣдущыя истиннаго Бога

просвѣщаль еси и работати единому Богу научаль еси. Сего ради со апостолы радуешися, приѣмля награду благовѣстника Христова.

Ревностію Божіею по славѣ дивныхъ во святыхъ своихъ: Гурія, Варсонофія и Германа поревноваль еси, Ермогене, и тѣхъ молитвами вспомооществуемый въ обители святителей преселился еси, предстоя Единому Пастыреначальнику, Его же моли спастися всѣмъ намъ.

Милуя наказываль еси и наказуя миловаль еси, святителю, и сею мудростію ограждалъ еси отъ волковъ хищныхъ новопросвѣщенная чада твоя и вся овцы твоя.

Оплотомъ воли царевой, ревнующія по православію царства, немощныя въ вѣрѣ ограждалъ еси и къ попеченію о спасеніи царства во Христѣ Иисусѣ царя Θεодора призываль еси, указуя царству спасительное преображеніе.

Градъ Москва и съ нимъ вся Русь плакася горько, самозванцу воцарившуся и въ скверное латинство облекшуся, ты же единъ, яко крѣпкій поборникъ, сему нечестію противосталь еси и вѣру православную со дерзновеніемъ исповѣдалъ еси.

Ермогена исповѣдника, ему же много бысть прещенія смертнаго и словесъ жестокихъ отъ самозванца нечестиваго, пѣсньми ублажаемъ.

На Него же радуяся взирають, чини ангельстии и вси святии, Тому предстоиши нынѣ, Ермогене, и яко исповѣдникъ ходатайствуеша присно за Русь православную.

### Б о г о р о д и ч е н ь :

Адамово воззваніе, пренепорочная Дѣво, съ Тобою Господь и Тобою съ нами Богъ: разумѣйте сіе, языцы, и покарайтесь.

### Пѣснь 6. И р м о с ь :

Ризу мнѣ подаждь свѣтлу, одѣяйся свѣтомъ яко ризою, многомилостиве Христе Боже нашъ.

Соборомъ освященнымъ и повелѣніемъ царскимъ возшель еси, святителю, на престоль патріаршія власти, да спасеши Русь, напастыми многими обуреваему.

Вѣры нелицемѣрныя исповѣданіе непоколебимое начерталь еси, святителю, рукою твоею и сію вѣру предъ лицемъ всея церкви въ соборѣ Успенія Пречистыя исповѣдалъ еси, да

узрѣтъ вся Русь камень истинныя вѣры, на немъ же созиждется царство и утвердится въ православїи.

Языкъ твой трость книжника скорописца, имже заградилъ уста грѣшника и уста льстиваго и усмирися мятежъ нечестивыхъ.

Тму лжи, яже бысть окрестъ престола царскаго, просвѣщая словомъ истины, святыя мощи царевича Димитрія на рамена освященныхъ подъялъ еси и, показуя всей Руси православнѣй, во градѣ Москвѣ положилъ еси я, да возвѣщаютъ правду цареви и да укрѣпляютъ державу царей православныхъ.

Аще царь благочестивъ—реклъ еси святителю—и по вѣрѣ православнѣй поборатель, благословите о немъ Господа и возлюбите его, и въ страхѣ Божїи повинуйтеся ему и покоряйтеся.

Яко древо при исходищахъ водъ былъ еси у престола благодати, святителю, осѣняя прохладю утѣшенїя и многоплодіемъ правды царя православныя Руси.

И проповѣдуеши, и обличаеши, и призываеши, и молишися, и молитися во всѣхъ храмахъ повелѣваеши, святителю, и все сіе тщанїе о здравїи и спасенїи государя Богомъ вѣнчаннаго, о покоренїи ему всѣхъ враговъ его и о умиренїи его царства.

### Богородиченъ:

Богородице Дѣво, упованїе христіаномъ, покрый, соблюди, сохрани и спаси Русь, прибѣгающе ко Твоему заступленїю.

### А К А Θ И С Т Ъ.

#### Кондакъ 1.

Изрядный воеводо за вѣру, царя и отечество, великій игумене земли нашея во дни смуты и озлобленїя грѣховнаго, теплый утѣшителю всѣхъ напастуемыхъ и обремененныхъ скорбями многими, православный хранителю отеческихъ преданїй, ихже ради положилъ еси душу свою за други своя и насъ свободилъ еси отъ рабства иноземнаго и поруганїя латинства сквернаго и нынѣ отъ Господа прославленъ еси явленїемъ чудесъ твоихъ, ими же собралъ еси насъ къ ракъ мощей твоихъ, со умиленїемъ любви поющихъ

ти: Радуйся, святителю Ермогене, пастырю добрый Руси православныя.

### Икосъ 1.

Ангела хранителя, спутствующа и спасительная предлагающа, яви ты Руси милосердый Христось во дни нестроения, да спасеть ю отъ блужданія грѣховнаго. И нынѣ яви ты молитвенника и чудотворца, яко знаменіе времени: да и нынѣ грядуть по тебѣ вси блуждающіи, яко овцы неимущыя пастыря, и обрѣтше тобою спасеніе, да поють тебѣ сице: Радуйся, церкви нашея премудрое возглавленіе: радуйся, о чадѣхъ церкви теплое промышленіе. Радуйся, царства нашего церковное утвержденіе: радуйся, сыновъ царства православное озареніе. Радуйся, епископомъ и мірянномъ доброе поученіе: радуйся, царемъ нашимъ совѣте и утѣшеніе. Радуйся, церкви и царства Христова кормило: радуйся, земли русскія православное свѣтило. Радуйся, святителю Ермогене, пастырю добрый Руси православныя.

### Кондакъ 2.

Видя Русь, яко вдовицу, зѣльнѣ плачущу о запустѣннѣи дома своего, умилосердився, на рамена своя подъяль еси скорби ея и даже до смерти понесль еси я. Блаженъ еси, состраждущій и плачущій предъ Богомъ: сего бо ради нынѣ вѣчно радуешися на небесѣхъ, поя Богу: аллилуіа.

### Икосъ 2.

Разумомъ любве, наказующія и милующія, управляль еси, святителю, народомъ православнымъ, яко кораблемъ, въ пучинѣ золь потопляемъ, и привелъ еси его къ тихой пристани православнаго самодержавія, окормляемаго спасительными преданьми святыя церкви, тѣмъ же благодарственно поемъ ты: Радуйся, мудрости міра сего отрекійся: радуйся въ безуміе Христа ради облекійся. Радуйся, ума Христова вмѣстилище: радуйся, разума Церкви хранилище. Радуйся, главо, свѣтъ истины излучающа: радуйся, премудросте, немудрыя просвѣщающа. Радуйся, благовѣстниче православныя правды: радуйся, обличителю челоувѣческія неправды. Радуйся, святителю Ермогене, пастырю добрый Руси православныя.

## Кондакъ 3.

Силою вѣры вся превозмогль еси, святителю, и всеоружіемъ божіей благодати вся побѣдилъ еси, вся бо можеть о укрѣпляющемъ Иисусѣ работающій Ему со страхомъ и радующійся Ему съ трепетомъ, поя Ему: аллилуіа.

## Икосъ 3.

Имѣя благодать священства, добръ носиму въ благоухающемъ сосудѣ души твоея, былъ еси, святителю, источникъ силы, Русь оскудѣвающую восполняющій, тою бо спасенна, благодарственная поеть ти: Радуйся, іерею, Богомъ избранный: радуйся, священниче, благодатию облагодуханный. Радуйся, епископе, зеркало совѣсти нелицепріятныя: радуйся, святителю, кадило молитвы благопріятныя. Радуйся, пастырю святыя Церкви, со властію Духа управляяй: радуйся, митрополите, о славѣ Церкви неусыпно промысляяй. Радуйся, патріарше, имъже Русь изыде на пажить веселія: радуйся, патріарше, имъже Русь обрѣте радость спасенія. Радуйся, святителю Ермогене, пастырю добрый Руси православной.

## Кондакъ 4.

Бурею помышленій сумнительныхъ и стремленій мятежныхъ волнуема, хищники и искатели царскія власти наводняема и въ пучину инославнаго суемудрія погружаема. Русь утопаше: узрѣвъ-же тя, яко Христа, единого непотопляемаго и бурею смуты непоколеблемаго, возрадовася надеждою и, руку спасенія получивъ, поеть Богу: аллилуіа.

## Икосъ 4.

Слышавше татіе Церкви и разбойницы царства гласъ твой, святителю, яко власть имущаго, благодатию истины исполненный, скрежетаху зубы своими и трепетаху яко бѣси, иже и нынѣ трепещуть силы твоея у раки мощей твоихъ. Мы же, почитая сію силу, яко Божію, во утвержденіе православнаго царства на камени церковнѣмъ источаему, поемъ ти сильному о Господѣ: Радуйся, крѣпкій поборниче противу самозванныхъ повелителей: радуйся, обличителю непризванныхъ спасителей. Радуйся, суемудраго инославія

праведное поруганіе: радуйся, спасительнаго православія немолчное назиданіе. Радуйся, церковь и царство союзомъ нераздѣльныя любви соединивый: радуйся, царя и царство въ послушаніе православія плѣнивый. Радуйся, православныя державы неизблемое утвержденіе: радуйся, царю нашему скорая помощь и наставленіе. Радуйся, святителю Ермогене, пастырю добрый Руси православныя.

#### Кондакъ 5.

Нову звѣзду показа ты на небесѣхъ славы въ сонмѣ священномучениковъ Господь Вседержитель, зане и на земли былъ еси звѣзда свѣтла, осіявающа царя и царство свѣтомъ православія и путеводствующа ко угожденію Единому Богу, поя Ему: аллилуіа.

#### Икосъ 5.

Видѣша ты православніи, яко свѣтило церковное, безоблачно сіяющее въ просвѣщеніе омраченныя страстьми, устремишася къ тебѣ изъ мрака обольщенія лестию и страхомъ человѣческимъ и воспріяша отъ тебе спасительное дерзновеніе, еже даруй и намъ грѣшнымъ, поучающимся у раки мощей твоихъ симъ пѣніемъ: Радуйся, почитайя царя, яко Божіе дарованіе: радуйся, мняй быти ему всемъ развращеннымъ въ наказаніе. Радуйся, царя Θεодора къ огражденію немощныхъ вѣрою склонивый: радуйся, быти ему отцемъ любящимъ и вѣчное спасеніе ихъ умоливый. Радуйся, царя Василія твердости учивый: радуйся, въ радости и въ горѣ другъ ему бывый. Радуйся, царя нашего пребывающее благословеніе: радуйся, во всехъ дѣлѣхъ небесное ему поможеніе. Радуйся, святителю Ермогене, пастырю добрый Руси православныя.

#### Кондакъ 6.

Проповѣдникъ велія благодати, ниспосылаемья православнымъ людямъ неусыпающими молитвами Богоматере былъ еси, святителю Ермогене. Сего ради удостоился еси отъ Пречистыя взяти отъ земли святую икону Ея, во градѣ Казани явленную, и прославити ю по достоянію, яко щить и заступленіе Руси, поя Честнѣйшей горнихъ воинствъ: аллилуіа.

## Икосъ 6.

Возсіявшу свѣту истины Христовой, во свѣтѣ православія ходимъ и бѣжимъ всякія лжи, да достойни будемъ небеснаго патриарха всея Руси, святителя Ермогена, ему же поемъ со воскликновениемъ: Радуйся, чудотворныя иконы казанскія первое прославленіе: радуйся, теплыя любви Богоматере умиленное пѣснопѣніе. Радуйся, вѣруай молитвамъ Владычицы, яко всеильному огражденію: радуйся, вѣривый православное воинство Ея матернему заступленію. Радуйся, Божию Матерь всѣмъ сердцемъ своимъ возлюбивый: радуйся, на молитву предъ Нею Русь страждущу приклонивый. Радуйся, домъ Пречистыя, яко хоругвь православнаго царства почитай: радуйся, о утвержденіи сего царства предъ Пречистою рыдаяй. Радуйся, святителю Ермогене, пастырю добрый Руси православныя.

## Кондакъ 7.

Хотя быти пастырь добрый, ему же суть овцы своя, видѣвъ волка грядуща, не оставлялъ еси овцы и не бѣгалъ еси, но предъ ними ходилъ еси во всеоружіи силы и истины, поя Богу: аллилуіа.

## Икосъ 7.

Новаго челоуѣка по образу Создавшаго его, а не новаго царства инославнаго измышленія, возжелѣлъ еси, святителю Ермогене. Сего ради ополчился еси за царство древлеправославное, еже тщится во всѣхъ людѣхъ и во всемъ житіи ихъ вообразити Христа Господа. Поемъ и славимъ сіе православное ратоборство и радуяся вопіемъ ти: Радуйся, волковъ хищныхъ нещадное изгнаніе: радуйся, коварства ихъ мудрое распознаніе. Радуйся, царства православнаго вѣрное спасеніе: радуйся, стада Христова церковное огражденіе. Радуйся, яко кокошь птенцы своя созываяй: радуйся, яко орелъ, птенцы своя покрываяй. Радуйся, православія великій ревнителю: радуйся, царемъ и царству церковный учителю. Радуйся, святителю Ермогене, пастырю добрый Руси православныя.



## Кондакъ 8.

Странно міролюбцемъ зрѣти, како святитель Ермогенъ, во плоти сынъ, не себѣ угождаетъ, како славу, честь и вся мірская, яко прахъ, попираетъ и горняя мудрствуетъ, ищущи славы у Единого, на небесѣхъ живущаго, поя Ему: аллилуіа.

## Икосъ 8.

Весь бѣ ревнующъ ревностію Ілии пророка, святителю Ермогене, егда узрѣлъ еси запустѣніе царства и поруганіе святынь православія, и огнемъ сея ревности воспламенилъ еси сердца всѣхъ православныхъ во спасеніе Руси, поющія ти нынѣ съ любовію: Радуйся, Духа Божія не угашаяй: радуйся, дарованіе благодати возгрѣваяй. Радуйся, Духомъ Божиимъ пламенѣющій: радуйся, яко орелъ надъ міромъ симъ парящій. Радуйся, созерцай горняя: радуйся, одухотворяй дольняя. Радуйся, сею ревностію о царствѣ ревновавый: радуйся, царству нашему путь православнаго строительства указавый. Радуйся, святителю Ермогене, пастырю добрый Руси православныя.

## Кондакъ 9.

Все естество ангельское, видяще православныя люди во храмѣ Пречистыя Богородицы со умиленіемъ ко Господу принадлежащія и во грѣсѣхъ своихъ съ сокрушеніемъ кающіяся, да отвратитъ Господь гнѣвъ свой, праведно на землю русскую движимый, зѣло радуется, поя Богу: аллилуіа.

## Икосъ 9.

Вити безмолвствуютъ, сладкозвучни-же благодатію святителіе Ермогенъ и Іовъ проповѣдуютъ покаяніе во отпущеніе грѣховъ, ихъ же ради гнѣвъ Божій потрясаетъ царства, и исторгаютъ слезы покаянія и вопли рыданія, ими же согрѣшившая Русь омылася есть, освятилася, оправдалася и нынѣ поетъ своему по Бозѣ помощнику православно: Радуйся, грѣшныя отечески наказуй: радуйся, покаяніе, яко спасеніе отъ всѣхъ золь, благовѣствуяй. Радуйся, властію отъ Бога грѣхи царства разрѣшаяй: радуйся, отъ всякія скверны плоти и духа православныя очищаяй. Радуйся, слезными теченіями землю нашу оросивый: радуйся, плоды послушанія святѣй

церкви на ней возрадивый. Радуйся, рыданьми покаянія лице царства обновивый: радуйся, милость Божию къ намъ грѣшнымъ обративый. Радуйся, святителю Ермогене, пастырю добрый Руси православныя.

#### Кондакъ 10.

Спасти хотя Русь отъ безначалія грѣхлюбиваго не къ темному западу, но къ богобоязненному дому Романовыхъ обратилъ еси очи свои, святителю Ермогене, да будетъ онъ властію отъ Бога во утвержденіе Христова Закона и да поють царіе и людіе единѣми усты и единѣмъ сердцемъ Спасителю Богу: аллилуіа.

#### Икосъ 10.

Стѣна несборимая Церкви былъ еси, святителю, ея же царство русское оградися, въ православіи утвердися и отъ враговъ спасеся и нынѣ поеть ти благодарственно: Радуйся, мудрованіе Запада отвергаяй: радуйся, православное житіе благословляяй. Радуйся, святыхъ преданій хранителю: радуйся, уставовъ церковныхъ ревнителю. Радуйся, молитву и постъ, яко сокровище спасенія, лобызаяй: радуйся, святыхъ иконъ и мощи святыхъ со благоговѣніемъ почитаяй. Радуйся, дому Романовыхъ радость благовѣствуяй: радуйся, въ немъ Божию милостию царя всея Руси указуяй. Радуйся, святителю Ермогене, пастырю добрый Руси православныя.

#### Кондакъ 11.

Пѣніе исходное и рыданіе надгробное творить святая Русь у гроба святителя Ермогена, положившаго душу свою за други своя. Не плачите, православніи, но паче держайте вѣрою: праведникъ бо и по смерти будетъ жити во вѣки, поя Богу: аллилуіа.

#### Икосъ 11.

Свѣтильникъ Христовъ, на верху горы стояй и всей Руси свѣтяй былъ еси, святителю Ермогене. И се, полагаешия подъ спудомъ могильнымъ плотію, да возсіяеши духомъ, яко солнце, во царствіи Отца Небеснаго, насъ же да научиши сице пѣти болѣзни и труды твоя: Радуйся, съ престола патриаршаго беззаконно сверженный: радуйся, въ темное под-

земеліе, яко во гробъ вверженный. Радуйся, и здѣ овцы своя волкомъ хищнымъ не предавый: радуйся, и здѣ спасеніе Руси благовѣствовавый. Радуйся, правды ради многими скорбями терзаемый: радуйся, гладомъ и мученьми даже до смерти изнураемый. Радуйся, мучениче, за православіе царства пострадавый: радуйся, страстотерпче, въ руцѣ Господу духъ свой предавый. Радуйся, святителю Ермогене, пастырю добрый Руси православныя.

#### Кондакъ 12.

Благодати Божіей сокровище явися святая и всечестная рака твоя, святителю отче Ермогене, и источникъ приснотекущія силы, ею же бѣси изгоняются, недужніи исцѣляются, хроміи ходять, глухіи слышатъ, слѣпці прозрѣвають, озлобленніи смиряются, скорбящіи утѣщаются и вси ликуютъ о Господѣ и прославляютъ Бога, дивнаго во святыхъ своихъ, поюще Ему: аллилуіа.

#### Ікосъ 12.

Поюще твое прославленіе, святителю Ермогене, сіи пѣсни приносимъ ти, чудотворче святыи, яко благоуханіе христіанскія радости: зримъ бо Божію силу не токмо въ немощехъ, но и въ останкахъ твоихъ совершаему. И нынѣ озаряеши насъ свѣтомъ твоея благодати, обвеселяя сердца наша пѣти ти со умиленіемъ: Радуйся, ты бо Сладчайшаго присно созерцаеши: радуйся, ты бо лицемъ къ лицу Христа воспѣваеши. Радуйся, ты бо отъ лица Его озаряешися божественнымъ свѣтоизліаніемъ: радуйся, ты бо во свѣтѣ лица Божія награждаешися небеснымъ сіяніемъ. Радуйся, ты бо божественною силою преображаешися отъ славы въ славу: радуйся, ты бо, яко солнце новое, украшаеши Его державу. Радуйся, ибо твоимъ сіяніемъ и мы незримо просвѣщаемся: радуйся, ибо твоею силою и мы оживотворяемся. Радуйся, святителю Ермогене, пастырю добрый Руси православныя.

#### Кондакъ 13.

О преславный угодниче Божій, добрый пастырю Руси, святителю отче нашъ Ермогене. Примми наше твоей славы сорадованіе, яко воздыханіе души: жаждетъ бо несть-

емлемья радости, и умоли Пастыре-Начальника Христа даровати и намъ пребывающую благодать утѣшенія и радovanja, да веселится предъ лицомъ Его Русь и да поеть Ему выну: аллилуіа.

Сей кондакъ глаголи трижды.

И паки четется 1-ый и ко съ: Ангела хранителя...

И паки 1-ый кондакъ: Изрядный воевода...

Пѣснь 7. Ирмосъ:

Отроцы благочестивіи въ Вавилонѣ, образу златому не поклонишася, но посредѣ огненныя печи орошаеми, пѣснь воспѣваху, глаголюще: превозносимый отцевъ и нашъ Боже, благословенъ еси.

Огнемъ лютыя злобы опаляема, печи огненнѣй уподобилася есть православная Русь во дни смуты, силою же словесъ твоихъ, святителю, орошаема и до днесь поеть православно: отцевъ и нашъ Боже, благословенъ еси.

Гласъ въ соборѣ Успенія Пречистыя слышанъ бысть: покайтеся о злобѣ вашей, врази царю православному и Богови, ибо Богомъ вѣнчанъ есть на царство и Богомъ царствуетъ во утвержденіе Христовой правды, поя Ему православно: Отцевъ Боже, благословенъ еси.

Отецъ всея Руси царь нашъ и хранитель отеческихъ преданій со властію: сего ради повинуйтеся ему и покарайтеся и пойте съ нимъ имени Всевышняго: отцевъ и нашъ Боже, благословенъ еси.

Молитесь и поститесь и измѣнитесь въ новаго чловѣка, одѣяна въ добродѣтели боголюбія и царелюбія: да подасть всѣмъ намъ Господь миръ и любовь, царству крѣпкое единеніе, царю побѣду на враги и одолѣніе.

Любовію къ царю согрѣваяйся и ревностію по вѣрѣ паче огня разгораяйся попадалять еси, святителю, тернія грѣхлюбивыя смуты, обновляя и утверждая обветшавшее царство.

Юнцы тучниі: самозванцы мятежниі, цари иноземниі и измѣнницы нечестивіи одержаша Русь, предъ лицомъ же твоея правды, святителю, исчезоша яко дымъ отъ огня, да веселится православный царь о Господѣ и да торжествуетъ православіе.

Богови работницы и тебѣ помощницы быша Святителіе

Христовы: Филаретъ Ростовскій, Ефремъ Казанскій, Θεоктистъ Тверскій и Галактіонъ Суздальскій, имиже во всю землю изыде слово твое, Ермогене святителю, и въ концы Руси вѣщаніе твое.

### Богородиченъ:

Иже въ напастехъ и въ скорбехъ, и въ болѣзняхъ обремененніи грѣхи многими, приидите къ Заступницѣ усерднѣй, Матери Господа Вышняго: Та бо исцѣлитъ вы и утѣшитъ и упокоитъ.

### Пѣснь 8. Ирмосъ:

Богоглаголивѣи отроцы въ печи, со огнемъ пламень попирающе, пояху: благословите дѣла Господня Господа.

Милостивни многи творилъ еси людемъ, святителю, егда богати обнищаша милостію и сребролюбія ради не внимаху еже помощи неимущимъ: ты же реклъ еси келарю Сергіевой обители Авраамію и житницы отверзошася и алчущіи насытишася и благословиша Господа.

Аще и пѣвнися житейское море, аще и бѣснуется воздвизаемо напастей бурей, не потопити ему корабля Іисусова: на камнѣ бо вѣры и правды стоимъ. Тако реклъ еси, святителю, и бысть тако, и се, торжествуютъ православніи и благословляютъ Господа.

Яко добрый кормчій, привелъ еси, святителю, корабль Россійскія державы къ тихой пристани православныя Церкви: и се, царство наше осоляется благодатію св. Духа и благословляетъ Господа.

Реклъ еси, святителю, боящимся Господа: не бойся, малое стало, яко благоизволилъ есть Отецъ Небесный даровати намъ царство. Тако вѣровалъ еси и тако по вѣрѣ воспріялъ еси. И се, святая Церковь радуется о православіи царства и благословляетъ Господа.

Уничжишиша тя возстающіи на тя, метающе прахъ и песокъ въ лице твое, да отречешися отъ Божія помазанника, ты же вся претерпѣлъ еси правды ради, благословляяй Господа.

Святая и Богомъ любимая Русь не погибнетъ, реклъ еси, святителю, измѣнникомъ и предателемъ и всѣмъ врагомъ

нашимъ: всуе труждаетесь, аще не Господь созидаетъ. Покайтесь и благословите Господа.

Не вѣдаемъ, како и нареши васъ, рекль еси, святителю, мятежникомъ и измѣнникомъ: отступили бо есте отъ Бога, отпали отъ соборныя и апостольскія церкви, отступили отъ Богомъ и святымъ елеемъ помазаннаго царя, забыли есте обѣты православныя вѣры нашея: стояти до смерти за домъ Пресвятыя Богородицы и за царство православное. Покайтесь и обратитесь и благословите Господа.

### Богородиченъ:

Еже о насъ исполняя смотрѣніе Божіе и яже на земли соединяя небеснымъ, носила еси во чревѣ отъ Духа Свята, Пренепорочная, и родила еси намъ всѣхъ Бога, Егоже вся дѣла Господня поютъ и превозносятъ во вся вѣки.

### Пѣснь 9. Ирмосъ:

Воистину Богородицу тя исповѣдуемъ, спасеніи тобою Дѣво чистая, съ безплотными лики Тя величающе.

Пречистѣй Владычицѣ ввѣрилъ еси, святителю, православное воинство, и стояти за вѣру неподвижно даже до смерти благословилъ еси, и боятися Единаго на небесѣхъ живущаго научилъ еси. Сего ради со исповѣдники православныя правды радуешися.

Окаянныя измѣнники анаѳематствовалъ еси, православнымъ же воиномъ и всѣмъ ревнителемъ православнаго царства милость отъ Господа Бога и отъ своего смиренія благословеніе преподаль еси, святителю, имже бысть побѣда и одолѣніе и всея Руси спасеніе, тебѣ же вѣнецъ отъ Бога, яко строителю святыя жизни.

Гласъ огненныя ревности о спасеніи царства не вяжется, аще и заключается во хранилѣ пустѣ, яко во гробѣ: огласить-бо всю Русь и воздвижетъ спасительную брань во славу святыя Церкви и во утвержденіе царствующаго дома Романовыхъ, его же возлюбилъ еси и о немъ же молишися Богу.

И первопрестольникъ апостольскія церкви, и исповѣдникъ православныя вѣры, и второй Златоустъ во обличеніе грѣхобливыхъ и мятежныхъ, и строитель православнаго царства былъ еси, святителю, и за сіе произволеніе темницею и гла-

домъ мучимъ былъ еси и пріявъ отъ Бога неувядаемый вѣнецъ, съ мученики веселишися.

Богу нашему тобою слава, тебѣ же, священномучениче Ермогене, довлѣтъ радоватися во свѣтъ лица Его и непрестанно молитися, да не погибнетъ Русь православная, но да будетъ даже до конца свѣтъ во откровеніе языкомъ православныхъ правды.

Нищъ и боляй есмь азъ, святителю, и во смиреніи своемъ припадаю къ цѣльбоноснѣй рацѣ твоей, исцѣлѣнія требую.

Егоже возлюбилъ еси, Емуже душу свою предалъ еси и нынѣ предстоиши со дерзновеніемъ яко мученикъ: моли Бога о насъ, святой священномучениче Ермогене.

#### Богородиченъ:

Тя исповѣдуемъ, яко Матерь Господа Вышняго, и, невозвратну надежду имуще на Тя, молимся Тебѣ умиленною душею и сокрушеннымъ сердцемъ: всѣмъ полезная даруй и вся спаси, Богородице Дѣво, Ты бо еси божественный покровъ рабомъ Твоимъ.

#### Свѣтилѣнъ.

Подобенъ: Жены услышите.

Во свѣтъ православія, его же ревнитель былъ еси, святителю Ермогене, зришь свѣтъ истины, въ немъ же полнота дарованій Духа, радуемся о Господѣ и величаемъ озарившаго тя свѣтомъ присноживотнымъ.

Слава, и нынѣ, Богородиченъ.

Матерь незаходимаго свѣта, осіявающую Русь покровомъ матерняго заступленія, пѣсньми величаемъ, яко свѣтлѣйшую горнихъ воинствъ.

На хвалитѣхъ стихиры на 6, гласъ 7.

Сотворите въ пѣснѣхъ судъ написанъ: слава сія будетъ великому Ермогену: той бо есть православія ревнитель и всея Руси хранитель, яко орелъ птенцы своя покрывающій.

Хвалите Бога во святѣмъ его: той бо возвеличилъ есть его и во всѣхъ дѣлѣхъ его оправдалъ есть его утверждениемъ силы его.

Хвалите святаго въ силѣ его: вся бо можетъ о укрѣпляю-

шемъ Исусѣ. Хвалите его по множеству чудесъ его: вся бо недужныя исцѣляетъ о имени Господнемъ.

Хвалите святаго во псалмѣхъ и пѣсняхъ, хвалите его въ пѣніихъ духовныхъ, величайте славу отецъ нашихъ, воспѣвайте утвержденіе царей нашихъ, радуйтесь о немъ и веселитесь.

Хвалите святаго въ соборѣ освященныхъ, похвалите его вси людіе: той бо есть красота церковная, той бо есть доброты народная, той бо есть радость царева.

Хвалите святаго во святителѣхъ, похвалите его во святѣйшихъ патріарсѣхъ, ублажите его во исповѣдницѣхъ и прославите его во священномученицѣхъ. Хвалите его во всѣхъ дѣлѣхъ его.

#### Слава, гласъ тойже:

Приидите ублажимъ пастыря добраго земли нашея, за вѣру Руси вся претерпѣвшаго, и за православіе царства душу свою положившаго, и нынѣ милостію Божіею чудотворца, явленнаго во утвержденіе вѣры немощствующихъ, и во исцѣлѣніе всѣхъ недугующихъ, и во упокоеніе озлобленныхъ грѣхи многими, да вси возрадуемся и да поемъ ему: Радуйся, любя, насъ согрѣвающая. Радуйся, сило, насъ исцѣляющая. Радуйся, разуме, всѣхъ просвѣщающій. Радуйся, страже, православіе царства охраняющій. Радуйся, святителю Ермогене.

#### И нынѣ, Богородичень, гласъ тойже:

Приидите восхвалимъ прехвальную, славнѣйшую всѣхъ земнородныхъ и честнѣйшую небесныхъ воинствъ Матерь Господа Вышняго, Заступницу Усердную.

Славословіе великое. И отпустъ. Дается же и елей брати отъ кандила святаго, и часъ 1-й. На литургіи: Блаженна отъ канона: пѣснь 3 и пѣснь 6: Прокимень, гласъ 7: Возвеселитесь праведникъ о Господѣ, и уповаеъ на Него. Стихъ: Услыши, Боже, гласъ мой. Апостолъ къ евреемъ, зачало 355. Аллилуіа, гласъ четвертый: Священницы Твои облечутся въ правду. Евангеліе Іоанна, зачало 36. Причастень: Въ память вѣчную.

---